

JA' SCARTA SANTIAGO

1 Jo'on li Santiagoune, jo'on yajtunelun li Diose schi'uc li Cajvaltíc Jesucristoe. Chajc'oponic batel ta carta, jo'oxuc li t'ujbiloxuc yu'un Dios ti butic xa oyoxuc ta yantic o balumile.

**Ja' sc'oplal ti chac' jna'tic
li Diose li c'usi lec ta pasel
li c'alal oy jvocoltique**

²Li jo'oxuc li co'ol quich'ojtic ta muc' li Cajvaltique, muybajanic no'ox me li c'usi chc'ot ta atojolique.

³Yu'un xana'ic ti más ta stsatsub o avo'onic ta stojol li Dios mi icuch avu'unic li c'usi chc'ot ta atojolic ta sventa ti ach'unojic ti ja' chascoltaic li Cajvaltique. ⁴Ja' yu'un cuchuc me avu'unic li vocole, ja' ta stsatsub o avo'onic ta stojol li Diose. Jech scotol xu' chapasic ta sventa li Cajvaltique, jech mu xa c'usi yan sc'an avu'unic.

⁵Mi mu xana'ic c'usi lec ta pasel li c'alal chavich'ic vocole, ja' c'anbeic stuc li Diose, yu'un ta slequil yutsil yo'on chijyac'butic jna'tic jcotoltic. Mu sna' x'ilin, mu t'ujbiluc no'ox li buch'u tse'uxubine. ⁶C'alal chac'anbeic li Diose, sloq'ueluc me avo'onic. Mu me ta schibaluc avo'onic chac'anbeic. Yu'un li

buch'u ta schibal yo'on ta sc'anbee, ja' jech chac c'u cha'al li nab ti buyuc no'ox ta xyuq'uilanat ta ic' ta jujote. ⁷Li buch'u jech yo'one mu me c'usi tsta o. ⁸Yu'un mu staojuc o yav yo'on sch'unoj ti chcoltaat yu'un li Cajvaltique, yantic o li c'ustic tsnop ta jujun c'ac'ale.

⁹Mi mu c'usi x'ayan avu'unique, quermanotac, paso ta jun avo'onic yu'un snich'naboxuc xa li Diose.

¹⁰Mi jc'ulejoxuque, quermanotac, muybajanic no'ox yu'un la xa sbic'tajes avo'onic li Diose. Yu'un li buch'utic jc'uleje mu jaluc ta xtun yu'unic li sc'ulejalique. Ja' jech chac c'u cha'al nich ts'i'lele ti mu jaluc leque. ¹¹Yu'un c'alal ta xtoy talel li c'ac'ale, ta xq'uixnaj, jliquel ta xtaquij o ta ora li ts'i'lele. Li sniche ta xlilij yalel ta lumtic, muc xa bu c'upil sba. Ja' no'ox jech e'uc li jc'ulejetique, c'alal yaquic ta sa'el más sc'ulejalique, ja' o chchamic.

**Ja' sc'oplal ti mu me xchibaj co'ontic
mi chtal volcol ta jtojoltique**

¹²Muybajcutic no'ox mi icuch cu'untic li vocole. Yu'un mi mu xchibaj co'ontique, mi scotol icuch cu'untique, chc'ot quich' jtojoltic, ja' li jcuxlejaltic sventa sbatel

osile. Yu'un jech yaloj ono'ox li Diose: "Chcac'be scuxlejalic sventa sbatel osil scotol li buch'utic oyun ta yo'onique", xi. ¹³Mi ja' ba jpastic li c'ustic chopol ta scoj li vocole, mu me xaltic ti Dios lisujutique. Yu'un li Diose mu sna' spas li c'ustic chopole, ja' yu'un mu xisujutic ta spasel li c'ustic chopole. ¹⁴Li jujunutique ta scoj ti chopol ono'ox co'ontique ti chba jpastic li c'ustic chopole. Ja' chislo'loutic li co'ontique. ¹⁵Mi ta co'ontic ono'ox ti ta jpastic li c'ustic chopole, ta ono'ox jpastic. Mi ja' laj cac'betic yipal ta spasel li c'ustic chopole, chijch'ay o sbatel osil.

¹⁶Li jo'oxuc li co'ol quich'octic ta muc' li Cajvaltique, ti c'uxoxuc ta co'one, mu me xalo'lo aba atuc. ¹⁷Scotol li c'ustic lec chij'ac'bate schi'uc li c'ustic ja' sventa chijtuq'uib oe, ja' chijyac'butic talel li Dios ta vinajele, ja' li buch'u la spas scotol li c'ustic chac' xojobal ta vinajele. Li c'ustic xojobianic chquiltique chmac li xojobale, pero li Diose mu sjelta li c'usi snopoje. Scotol li c'usi chijyac'butic talele ja' sventa jlequilaltic. ¹⁸Yu'un jech isnop stuc ti jo'otic ba'i snich'nabutic yu'un jo'otic ba'i ica'itic li sc'op ti ja' melele. Ja' yu'un lec chijyilutic.

Ja' sc'oplal ti lec scotol c'ustic ta jpastic mi ta melel ti quich'octic ta muc' li Cajvaltique

¹⁹Li jo'oxuc li co'ol quich'octic ta muc' li Cajvaltique, ti c'uxoxuc ta co'one, yu'un snich'naboxuc xa li Diose, a'ibeic me lec smelol li c'u sba chayalbeic li sc'op Diose.

Mu me ta aniluc xatac'avic. Mu me ta aniluc xa'ilinic. ²⁰Yu'un mi cha'ilinique, mu me spas o avu'unic li c'usi tsc'an li Diose. ²¹Ja' sc'an chavictaic scotol li c'u sba atalelique. Ja' sc'an ti chabic'tajes abaique, ti chach'unic li sc'op Dios ti ava'iojique. Yu'un li sc'op Diose ja' chijcolutic o sbatel osil.

²²Ja' me xapasic li c'ustic yaloj Dios li ta sc'ope, mu me jechuc no'ox xava'iic. Mi yu'un noj chava'iique, mu'yuc sbalil. ²³Yu'un mi naca no'ox chca'itic li sc'op Diose, mi mu jch'untique, ja' jechutic jech chac c'u cha'al li buch'u ta sq'uel sat ta nene. ²⁴Ac'o mi iyil ti oy yic'ubal sate, ta ora no'ox ta xch'ay ta sjol, lec cha'i sba. ²⁵Li c'ustic chijyalbutic li Diose lec. Mi ja' mu xch'ay ta co'ontic li sc'op Diose, mi ja' ta jpasulantic li c'usi chale, jech ma'uc xa jtunelutic yu'un li c'ustic chopole yu'un ma'uc xa ta jpastic. Ja' yu'un xijmuybajutic o.

²⁶Mi oy buch'u chal ti yich'oj ta muc' li Diose, pero mi chopol to chc'opoje, stuc no'ox chilbajin sba. Altic chal ya'el ti yich'oj ta muc' li Diose. ²⁷Mi ta melel ti quich'octic ta muc' li Diose, ta jc'uxubintic li buch'utic chich'ic vocole, mi me'onetic, mi me'anal antsetic. Schi'uc mu xcac'tic ta soquel co'ontic. Mi jech ta jpastique, lec chijyilutic li Diose, ja' li Jtotique.

Ja' sc'oplal ti mu me t'ujbiluc ta jcha'letic li jchi'iltique

2 Li jo'oxuc ti la xa ach'unic ti ja' chascoltaic li Cajvaltuc Jesucristo li toj ech'em slequil

yo'one, mu me t'ujbiluc xacha'leic la achi'ilique. ²Nopic me c'usi chapasic mi ch-ochic talem cha'vo' viniquetic li c'alal chatsob abaique. Li june caltic ti ja' jc'uleje. Lec sc'u' spac'al schi'uc oy lec yaniyoal sc'ob pasbil ta c'anal taq'uin. Li june abol sba, mu'yuc lec sc'u' spac'al.

³Mi ja' no'ox chavaq'uic ta venta li buch'u naca lec sc'u' spac'ale, xi chavalbeic: "La' chotlan li'i yu'un ja' lec chotlebal", xavutic. Mi ja' mu xavaq'uic ta venta li buch'u abol sbae, xi chavalbeic: "Li jo'ote ba va'lan le'e. Mi chachotie, chotlan ta balumil li' ta nopol coque", xavutic.

⁴Mi t'ujbil no'ox chacha'leic achi'ilique, muc bu lec.

⁵Li jo'oxuc li co'ol quich'octic ta muc' li Cajvaltique, ti c'uxoxuc ta co'one, a'iic me. Li buch'utic abol sbaic li' ta balumile, ja' t'ujbiluc ono'ox yu'un Dios yo' ac'o sch'unic ti ja' Yajcoltavanejic li Diose, ja' ch-ochic li yo' bu ta spas mantale. Yu'un co'ol schi'uc ja' sc'ulejalic ya'el ti sch'unojic xa ti ja' Yajcoltavanejic li Cajvaltique. Yaloj ono'ox Dios ti scotol li buch'utic oy ta yo'onic li Diose ch-ochic li yo' bu ta spas mantale. ⁶Li jo'oxuque mu xavaq'uic ta venta li buch'utic abol sbaique. Ja' no'ox chavaq'uic ta venta li jc'ulejetic ti chasujoque ta yabtele, ti ja' chastic'boxuc amulic ta stojol li j'abteletique. ⁷Schi'uc ja' chopol chc'opojic ta stojol Jesús ti avich'octic xa ta muq'ue.

⁸Mi melec ti ach'unojbeic smantal li Ajvalil cu'untique, ja' li Cajvaltique, co'ol c'ux chava'iic scotol, manchuc mi jc'ulej, manchuc mi abol sba. Yu'un jech

chal li smantal Dios ti ts'ibabile: "C'uxubino me achi'ilic jech chac c'u' cha'al c'ux chava'i aba atuque", xi. ⁹Pero mi t'ujbil no'ox chacha'leic la achi'ilique, oy amulic chayilic li Diose yu'un mu xach'unbeic li smantale. ¹⁰Manchuc mi ach'unojic scotol li yan smantaltaque, pero mi oy jp'eluc ti muc bu xach'unique, co'ol schi'uc muc bu ach'unojic o scotol. ¹¹Yu'un jun no'ox buch'u laj yal ti "mu me xamulivajic" xie schi'uc ti "mu me xamilvanic" xie. Ac'o mi muc bu xijmulivaj, pero mi lijmilvane, co'ol schi'uc muc bu jch'unojtic o jp'eluc li smantaltac li Diose yu'un mu yanticuc o buch'u laj yal li jup'el mantale. ¹²Ja' yu'un sc'an ti lec li c'ustic chavalique schi'uc li c'ustic chapasique, yu'un li Diose ta ono'ox xich' jc'optic yu'un laj xa scoltautic yo' jech mu jpastic li c'ustic chopole. ¹³Mi mu xije'uxubinvanutic li avie, ja' no'ox jech e'uc li Diose, mu xisc'uxubinutic li c'alal chc'ot sc'ac'alil chich' jc'optic li c'u sba la jpastic li jujunutique. Pero mi chije'uxubinvanutic li avie, ja' no'ox jech e'uc chisc'uxubinutic li Diose.

Ja' sc'oplal ti altic chalcaltic ya'el ti quich'octic ta muc' li Cajvaltique ti mi muc bu lec li c'ustic ta jpastique

¹⁴Li jo'oxuc li co'ol quich'octic ta muc' li Cajvaltique, mi mu c'usi lec ta jpastique, altic chalcaltic ti quich'octic ta muc' li Diose, mu xijcolutic o. ¹⁵⁻¹⁶Jech chac c'u' cha'al mi oy jun quermanotic, mi vinic, mi ants, ti mu'yuc sc'u' spac'al chquiltique, ti mu c'usi ts'lajes jujun c'ac'ale, mi jech chcalbetique:

“Batan, te q'uelo bu xata ba ave'el ac'u' apac'al”, mi xcutique, muc bu lec yu'un mu c'usi xcac'betic batel. Altic chcaltic ya'el ti quich'ojtic ta muc' li Cajvaltique. ¹⁷Ta sventa li c'ustic ta jpastique, yu'un ja' chcac'tic o ta ilel mi quich'ojtic ta muc' li Diose.

¹⁸Pero mi oy buch'u jech chiyalbe: “Jo'ote chaval ti persa sc'an ti naca lec li c'ustic chapase. Jo'one chcal ti xu' no'ox ti jch'unoj ti ja' Cajcoltavanej li Cajvaltique”, mi xie, chcalbe: ¿C'uxi chquil o mi melel ti ach'unoj ti ja' Avajcoltavanej li Cajvaltic mi muc bu ja' chapas li c'ustic leque? Ja' chavil o ti lec li c'usi ta jpase, ja' chana' o ti melel jch'unoj ti ja' Cajcoltavanej li Cajvaltique. ¹⁹Jo'ote xu' no'ox chava'i ti ach'unoj ti jun no'ox li Diose. Pero jech sch'unojic e'uc li pucujetique. Sna'ojic ti jun no'ox li Diose, ta xi'ic. ²⁰Li jo'ote yu'un mu xava'i aba ti altic chaval ti avich'oj ta muc' li Cajvaltique mi muc bu ja' chapas li c'usi leque, ja' yu'un chcal ava'i. ²¹Li jtotic jme'tic Abraham ta vo'onee ta sventa ti laj yac' ta smoton Dios li snich'one, ja' li Isaaque, ja' ta jna'tic o ti melel sch'unoj ti chcoltaat yu'un li Diose. Ja' yu'un lec i'ile o yu'un li Diose. ²²Li Abrahame sch'unoj ti ja' Yajcoltavanej li Diose, ja' yu'un la sch'un li c'alal i'albat yu'un Dios ti ac'o yac'be ta sventa smoton Dios li snich'one. Ja' yu'un ja' ta jna'tic o ti melel sch'unoj li Abraham ti ja' Yajcoltavanej li Diose. ²³Yu'un ic'ot ta pasel li sc'oplal li ts'ibabil comele: “Li Abrahame la sch'un ti chc'ot ta pasel li c'ustic i'albat

yu'un li Diose, ja' lec i'ile o”, xi ts'ibabil. Schi'uc ts'ibabil ta sc'op Dios nojtoc ti lec xil sbaic schi'uc li Diose, xichi chcalbe.

²⁴Ja' ta jna'tic o ti ma'uc no'ox ta sventa ti jch'unojtic ti chiscoltautic ti lec chijyilutic li Diose. Sc'an nojtoc ti lec li c'ustic ta jpastique, ja' to jech lec chijyilutic o li Diose. ²⁵Ja' no'ox jech e'uc li jmulivajel antse, ja' li Rahabe, lec i'ile yu'un Dios ti la spasbe lequilal li cha'vo' vinic li jpa'ivanejetic ti itaqueic batel yu'un li Josuee. Ta ts'acale la stac sutel ta yan xa o be, ja' yu'un muc bu stsaqueic. ²⁶Jech chac c'u cha'al cuxulutic li' ta balumile yu'un oy jbec'tal jtacupaltic schi'uc oy jch'uleltic. Ti manchuc oy scha'chopole, mu xijcuxi ti jechuque. Ja' no'ox jech nojtoc yo' chijcuxiutic o sbatel osile, sc'an ti ja' jch'unojtic ti chiscoltautic li Cajvaltique, schi'uc sc'an ti lec li c'ustic ta jpastique. Mi mu jch'untic schibale, mu xijcuxiutic o sbatel osil.

Ja' sc'oplal ti ta scoj quetic ti chisch'ayutique

3 Li jo'oxuc li co'ol quich'ojtic ta muc' li Cajvaltique, mu me epuc xa'ochic ta jchanubtasvanej. Yu'un jo'oncutic li ochemuncutic ta jchanubtasvaneje, na'ic me ti más tsots chich' jc'opcucic li Diose yu'un más jna'cutic ya'el. ²Jcotoltic oy to ep ti muc bu tue' chbat cu'untique, pero mi oy buch'u naca tue' ti c'usi chale, ta melel ja' jun lequil vinic ti tspajes sbae. ³Jech chac c'u cha'al mi chcac'betic sfrenoal ye li caa'e, tstam sbe. Ac'o mi biq'uit li

frenoe, chpaj yu'un. ⁴Jech nojtoc li barcoetique, ac'o mi biq'uit li xanubtasobile, chpaj o. Ac'o mi muc' li barcoe, ac'o mi chnet'e batel ta tsatsal ic', pero chbat ti bu sc'an yo'on li yajvale yu'un oy xanubtasobil. ⁵Ja' no'ox jech e'uc li coc'tique, biq'uit no'ox, pero ep c'usi tsloq'ues. Ta sventa li c'ustic lec chcaltique chtuqu'uibic o li crixchanoetique. Ta scoj li c'ustic chopol chcaltique chch'ayic o. Ja' jech chac c'u cha'al li c'oq'ue, ac'o mi biq'uit no'ox li c'alal chlique, ta xp'ol. C'alal chtup'e, ep xa'ox ic'ac' li te'etique. Ja' no'ox jech e'uc li coc'tique. ⁶Co'ol schi'uc c'oc' ya'el yu'un ja' chisch'ayutic. Yu'un jtaletic ti ep li c'ustic chopol chloc' ta quetique. Mu c'usi yan cu'untic ti chisch'ayutique, ja' no'ox li quetique. Ja' chisch'ayutic ti jayib c'ac'al li' cuxulutique. Ja' yabtel li pucuj ti mu xpaj li quetique. ⁷Li crixchanoetique xu' tspas ta manxo li c'ustic xcotetic ta balumile, schi'uc li mutetique, schi'uc li quiletan chonetique, schi'uc li choyetique, scotol. ⁸Pero li coc'tique muc buch'u xpaj yu'un. Ep li c'ustic chopol chloc' ta quetique. Oy chamebal ta quetic ya'el jech chac c'u cha'al oy schial ye li orachone; mi listi'utique, chijcham ta ora. Ja' no'ox jech e'uc li jo'otique, co'ol schi'uc jmilvanejutic ya'el mi ta jsocbetic yo'onic li crixchanoetique. ⁹Ta quetic nojtoc chcalbetic li Jtotic Dios ti toj ech'em slequil yutsilale. Ta quetic nojtoc chcctic li sjelol sloc'ol li Jtotic Diose. ¹⁰Jun no'ox li quetique pero cha'moj li c'usi chcaltique.

Chcaltic li c'usi leque, chcaltic li c'usi chopole. Quermanotac, mu me xtun mi jech ta jpastique.

¹¹Nop ava'iic mi chloc' ta jun no'ox nio' lequil jo' schi'uc jo' ti chi' ta ats'ame. ¹²Nop ava'iic nojtoc mi chataic sat oliva ta te'el higo, mi chataic sat higo ta yaqu'il ts'usub. Ja' no'ox jech li nio'e, mu xloc' talel lequil jo' li yo' bu chloc' ti chi' ta ats'ame.

**Ja' sc'oplal li c'u sba li jp'ijiltic
li chijyac'butic li Diose**

¹³Mi oy buch'utic p'ij avu'unique, mi lec sna'ic snopele, ac'o yaqu'ic ta ilel ti c'usi lec ta pasele. Mu me stoy sbaic ta sventa ti oy sp'ijilique. ¹⁴Yan mi ta scoj no'ox yit'ixal yo'onic ti tsc'an ch-ochic ta banquillale, mu me snopic ti oy sp'ijilique. Mu me snopic ti sch'unojbeic xa li sc'op Dios ti ja' melele. ¹⁵Yu'un mu me jechuc li jp'ijiltic li chijyac'butic li Diose. Li ta sventa jp'ijil jtuctique ja' no'ox ta jpastic jech chac c'u cha'al tspasic li buch'utic muc bu yich'ojic ta muc' li Cajvaltique. Ja' no'ox ta jpastic li c'usi ta jc'an jtuctique. Ja' no'ox ta jpastic li c'usi tsc'an li pucuje. ¹⁶Mi ta scoj yit'ixal co'ontic ti ta jc'an chij'ochutic ta banquillal yu'un li quermanotactique, ti p'ijutic jp'isoj jbatique, mu lecuc yu'un ja' noj ta jcontrain o jbatic, schi'uc ep li c'usiuc no'ox chopol chlic jpastic oe. ¹⁷Ti c'uxi yo' chvinaj o ti ac'bilutic jp'ijiltic yu'un li Diose, sc'an ti naca lec li c'ustic ta jpastique. Mu jliquestic c'op, ta jbic'tajes jbatic, ta jch'untic mantal, chijc'uxubinvan, chijcoltavan, tuc' li c'usi ta

jnoptique, mu xijlo'lovan. ¹⁸Ti muc bu ta jliquestic c'ope, ja' tschanic li yanetique.

**Ja' sc'oplal ti sc'an ti mu xa
jpastic jech chac c'u cha'al
tspasic li buch'utic muc bu
yich'ojic ta muc' li Diose**

4 Ti chaliquesic c'ope schi'uc ti chacontrain abaique, ja' ta scoj ti mu xapajes abaic ta sc'upinel li c'ustic oy li' ta balumile. ²Chac'anic ti ac'o oyuc avu'unic e'uc li c'ustic toj lec chavilique, pero mu xataic. Ja' yu'un chlic acontrain o abaic. Xti'et o avo'onic li buch'utic oy c'usi oy yu'unique, pero mu xataic o li c'ustic chac'anic e'uque. Ja' yu'un chaliquesic c'op, chacontrain abaic. Ti mu xataic li c'ustic chac'anique, yu'un mu xac'anbeic li Diose. ³Ac'o mi chac'anbeic li Diose, mu xayac'beic yu'un chopol la avo'onique, yu'un ja' sventa chba apasic o li c'usiuic no'ox chac'anic atuquique. ⁴Ja' jechoxuc jech chac c'u cha'al jun ants ti mu junuc yo'on ta stojol li smalale, yu'un li jo'oxuque mu junuc avo'onic ta stojol li Diose. ¿Mi mu xana'ic ti ja' jajcontraoxuc Dios chayilic mi ja' chapasic li c'ustic chac'anic atuquic jech chac c'u cha'al tspasic li buch'utic muc bu yich'ojic ta muc' li Diose? Li buch'u ja' no'ox tspas li c'usi tsc'an stuque, jech chac c'u cha'al tspasic li buch'utic muc bu yich'ojic ta muc' li Diose, ja' jajcontra Dios. ⁵Mu me xanopic ti xu' tec noj yil chava'iic ti jech ts'ibabil ta sc'op li Diose: “Mu jc'an c'usi yan xavich'ic

ta muc', jtuc no'ox xavich'icun ta muc'", xi ts'ibabil. ⁶Dios tsc'an ti ja' no'ox chquich'tic ta muc' li stuque, ja' yu'un ta slequil no'ox yo'on chiscoltautic yo' jech xu' cu'untic ti stuc no'ox chquich'tic ta muq'ue. Yu'un jech ono'ox yalaj li Diose: “Chopol chquil li buch'utic ta stoy sbaique. Yan li buch'utic ta sbic'tajes sbaique ja' más ta jcoltaic”, xi ono'ox. ⁷Ja' yu'un ac' abaic ta sc'ob li Diose. Contrainic li pucuje jech chi' loq'uel ta atojolic. ⁸Nopojanic ta stojol li Diose jech ta xnopoj talel ta atojolic e'uc. Ictaic li c'ustic chopol chapasique schi'uc ti mu junuc avo'onic ta stojol li Diose, ac'o ta poquel avo'onic. ⁹At avo'onic, oq'uitao abaic ta scoj ti chopol li c'ustic chapasique. Yu'un altic ti xatse'inic no'oxe, ti xamuybajic no'oxe ta sventa li c'ustic chapasique. ¹⁰Ja' lec bic'tajes abaic ta stojol li Cajvaltique, ja' lec chayilic o.

**Ja' sc'oplal ti sc'an ti mu
jlo'iltatic li jchi'iltactique**

¹¹Li jo'oxuc li co'ol quich'ojtic ta muc' li Cajvaltique, mu me xalo'ilta achi'ilic. Li buch'u tslo'ilta li schi'ile, ja' muc bu yac'oj ta venta ti yalaj Dios ti ac'o jc'uxubinan jbatique. Li buch'u ti mu xac' ta venta li c'usi yalaj li Diose, co'ol schi'uc más sna' ya'el. ¹²Jun no'ox li buch'u laj yal li mantaletique, ti chijyich'butic jc'optique, ja' li Diose. Ja' xu' chiscoltautic, xu' chal nojtoc ti chijch'ayutic o sbatel osile. Ja' yu'un li jo'oxuque ma'uc avabtelic ti chalo'iltaic la achi'iltaque.

**Ja' sc'oplal ti mu me jtoy jbatice
ta stojol li Diose yu'un mu
jna'tic li jc'ac'alil corailtique**

¹³A'iic jo'oxuc ti jech chavalique:
“Tana, mi oc'ob, te chijbatcutic
li ta jteclum li bu calojcutic
ono'oxe. Te chijoc'tsajcutic
junuc jabil. Te chijchonolajcutic
chijmanolajcutic, jech ta jtacutic o
talel ep jtaq'uincutic”, xachiic. ¹⁴Ti
jech chavalique, pero mu xana'ic
mi cuxuloxuc to ta sacub osil ta
yoc'omal. Yu'un li jo'otique ja' no'ox
jehcutic jech chac c'u cha'al lumil
toc ti j'ech'el no'ox ch-ech'e, yu'un
mu jna'tic li jc'ac'alil corailtique.
¹⁵Ja' sc'an ti jech chavalique: “Mi
tsc'an ti Cajvaltice ti cuxuluncutic
toe, xu' chijbatcutic”, chianic no'ox,
ja' lec. ¹⁶Ti chavalic ti ta ono'ox
xabatic li bu anopoj chabatique,
yu'un atoyoj noj abaic ta stojol li
Diose. Ja' mulil ti jech chapasique.
¹⁷Li buch'u sna'oj xa li c'usi lec ta
pasele, ti mu sch'une, ta sta smul ta
stojol li Diose.

**Ja' sc'oplal ti mu xcolic o ta
staq'uinic li buch'utic jc'ulejetique**

5 Li buch'utic ti ja' no'ox batem
ta yo'onic ta stsobel li c'ustic
oy yu'unic li' ta balumile, altic ta
snopic ti lec oyique yu'un ta ono'ox
xba yich'ic vocol. ²Yu'un li sc'ulejal
stsobojique ja' jech chil Dios jech
chac c'u cha'al li c'usi c'o'ic xae.
Li sc'u' spac'al stsobojique ja' jech
chil Dios jech chac c'u cha'al li
bu c'uxbil xa ta chile. ³Altic ti
stsoboj ep staq'uinique yu'un mu
xcoltavanic o. Mu xac' sbaic ta
tunel schi'uc li staq'uinic ta stojol

li Diose. Altic ti ta sc'anic ti oy
ep staq'uinique, ja' no'ox yaquic
ta stsobel svocolic ya'el ti chc'ot
yich'ic ta slajeb c'ac'ale. ⁴Ti sna'uc
xc'opoj li staq'uinique, jech chal:
“Jo'one scomenalun stojol svinictac
ta c'ajoj li cajvale yu'un muc bu
ts'acal la stoj”, xi ti jechuque. Ac'o
mi mu xc'opoj, pero li Cajvaltice ti
ja' yich'ojutic ta venta jcotoltique,
sq'ueloj ono'ox ti muc bu ts'acal la
stoj svinictac ta c'ajoj li jc'uleje. Ja'
yu'un chc'ot sc'ac'alil ti ta x'ich'bat
sc'opic ta scoj ti jech tspasique.
⁵Yu'un ja' no'ox batem ta yo'onic
tsc'an ti oy ep li c'ustic oy yu'un
stuquic li' ta balumile. Ja' no'ox
tspasic li c'ustic tsc'an stuquique.
Ja' jechic jech chac c'u cha'al li
vacax ti ja' no'ox ta snojes li sch'ute.
Pero altic, mu jechuc jal ta xcuxi
o, yu'un mi ijup' leque, chich' milel.
Ja' no'ox jechic e'uc li jc'ulejetic
ti ja' no'ox tspasic li c'ustic tsc'an
stuquique, mu staic scuxlejalic
sbatel osil. Ta xc'ot sc'ac'alil ti ta
j'ech'el ta xch'ayic o sbatel osile.
⁶Yu'un la sa'beic smul li buch'utic
mu'yuc smule. Laj yaq'uic ta milel.
Li buch'utic imilee muc bu spoj
sbaic, mu c'usi laj yalic.

**Ja' sc'oplal ti muybajcutic
no'ox jmalatic li c'u ora
chcha'tal li Cajvaltique**

⁷Li jo'oxuc li co'ol quich'ojtice ta
muc' li Cajvaltique, ts'iquic me c'usi
chaspasbeic li jc'ulejetique yu'un
xana'ic ti ta ono'ox xtal yic'oxuc li
Cajvaltique. Jech chac c'u cha'al li
buch'u ta x'abteje, xmuybaj no'ox
tsmala chyijub li c'ustic sts'unoje,
yu'un sna'oj ti yora xa ta stsob

scotol li sat li c'ustic sts'unoj li c'alal mi i'ech' yora jo'tique, yu'un taquin xa'ox. ⁸Ja'uc me jech li jo'oxuque, muybajanic no'ox, malaic ta xcha'tal li Cajvaltique. Oyuc stsatsal avo'onic ta stojol li Diose yu'un po'ot xa chcha'tal li Cajvaltique.

⁹Quermanotac, mu me xasa'be aba amulic ta scoj ti chavich'ic vocole yo' chata o atojolic li c'alal chtal li Jtojvanej cu'untique. Na'ic me ti po'ot xa chcha'tale.

¹⁰Quermanotac, mu me xch'ay ta avo'onic ti lec icuch yu'unic vocol li buch'utic iyalic sc'op Dios ta vo'onee, yu'un oy lec stsatsal yo'onic ta stojol li Diose. Ja' me sc'an ti jechoxuc e'uque. ¹¹Li jo'otique jna'o'jtic ti xmuybajic li buch'utic icuch yu'unic li vocole. Ava'iojbeic sc'oplal li Jove ti icuch yu'un li vocol ta sventa ti oy stsatsal yo'on ta stojol li Diose, schi'uc ti ep i'ac'bat slequil yutsilal Dios ta ts'acale. Ja' chquiltic o ti c'uxutic ono'ox ta yo'on li Diose, yu'un la sc'uxubin li Jove.

¹²Quermanotac, ja' me sc'an ti meel li c'usi chavaliq. Mu me xavalic "xilchox". "Meel", mi xachiiq, ac'o me meleluc. "Xu", mi xachiiq, ac'o c'otuc ta pasel avu'unic. "Mo'oj", mi xachiiq, yu'un me mo'oj o, yo' jech mu xata o amulic ta stojol li Diose.

¹³Mi oy avocolique, taic ta na'el li Diose. Mi xamuybajic no'oxe,

q'ueojinanic ta stojol li Diose. ¹⁴Mi oy buch'u ipe, ac'o yic' tale li banquilaletic li te ta ach'ulnaique, ac'o jaxbatuc asete ta sventa li Cajvaltique, ac'o c'oponbatuc Dios ta stojol. ¹⁵Li buch'u ta sc'oponbe Dios ta stojol li jchamelajele, mi sch'unoj ti ja' chcoltavan stuc li Cajvaltique, ja' ta xcol o li jchamelajele. Yu'un ja' chcoltavan stuc li Cajvaltique. Mi staoj smul li buch'u icole, ta spasbat perton nojtoc. ¹⁶Ja' yu'un jamal xavalbe abaic li bu layalic ta mulile, c'oponbe abaic Dios ta atojolic, jech chatu'uibic o. Li buch'utic tuc' yo'onic ti tstaic ta na'el li Diose, chtac'batic yu'un li Diose li c'usi chaliq, ja' yu'un chc'ot ta pasel yu'unic li c'usi vocol ta pasele. ¹⁷Li Elías li iyal sc'op Dios ta vo'one, li co'ol crixchanoutic jchi'uctique, ta sloq'uel yo'on la sta ta na'el Dios ti ac'o mu xac' li jo'e, ja' yu'un o'lol schanibal jabil muc bu xac' jo' li' ta cosilaltique. ¹⁸Ta ts'acale la sta ta na'el Dios nojtoc ti ac'o taluc li jo'e, lic yac' li jo'e. Lic satinuc scotol li c'ustic sts'unojique.

¹⁹⁻²⁰Quermanotac, mi oy buch'u ichibaj yo'on ta yich'el ta muc' li Cajvaltique, mi jo'ot chba acha'albe sc'op Dios ti jech ta scha'ich' ta muc' li Cajvaltique, na'o me ti jo'ot ta aventa ti ja' laj yicta o li c'ustic chopol tspase, ja' yu'un mu ch'ayeluc chbat o. Yu'un ipasbat perton yu'un Dios li smultac staoje.